

Tiga model pembukaan semula sekolah ikut saranan KKM, MKN
Astro Awani
01 Julai 2020
Madiha Abdullah,

PUTRAJAYA: Pembukaan semula sekolah secara berperingkat bermula 15 Julai ini akan dilaksanakan menerusi tiga model pengoperasian mengikut saranan Kementerian Kesihatan (KKM) dan Majlis Keselamatan Negara (MKN).

Menteri Kanan Pendidikan, Dr Radzi Jidin, berkata tiga model tersebut ialah Model Satu Sesi, Model Dua Sesi dan Model Penggiliran.

"Model Satu Sesi adalah bagi sekolah yang mempunyai bilik darjah atau ruang yang mencukupi bagi menempatkan semua murid dalam satu sesi, manakala Model Dua Sesi untuk sekolah sedia ada yang telah beroperasi secara dua sesi ataupun sekolah satu sesi yang kini perlu beroperasi secara dua sesi.

"Model yang ketiga adalah Model Penggiliran. Model ini ialah untuk sekolah yang tidak mempunyai ruang mencukupi bagi menempatkan semua murid walaupun dengan melaksanakan model dua sesi.

"Kebanyakan sekolah di dalam kategori ini adalah sekolah yang terletak dalam kawasan berkepadatan penduduk yang tinggi," kata beliau dalam sidang media khas Kementerian Pendidikan, pada Rabu.

Sekolah yang mengguna pakai Model Penggiliran perlu menentukan bentuk giliran yang sesuai berdasarkan keperluan murid, dengan mengaplikasikan kaedah pembelajaran secara hibrid, iaitu secara bersemuka di sekolah dan secara Home-Based Learning di rumah.

Maklumat senarai sekolah mengikut model yang telah ditetapkan akan dimaklumkan oleh KPM selewat-lewatnya seminggu sebelum sekolah dibuka semula sepenuhnya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/tiga-model-pembukaan-semula-sekolah-ikut-saranan-kkm-mkn-249380>